

欽定四庫全書

子部
本草綱目
總目
圖卷上之上



南京中医药大学图书馆版权所有

詳校官太醫院恩糧臣孔毓秀

編修臣倉聖脈覆勘

本草綱目原序

紀稱望龍光知古劒峴寶氣辨明珠故萍實商羊非天
明莫洞厥後博物稱華辯字稱康析寶玉稱倚頓亦僅
僅晨星耳楚斬陽李君東璧一日過予弇山園謁予留
飲數日予窺其人晬然貌也癯然身也津津然譚議也
真北斗以南一人解其裝無長物有本草綱目數十卷
謂予曰時珍荆楚鄙人也幼多羸疾質成鈍椎長耽典
籍若啖蔗飴遂漁獵羣書摭羅百氏凡子史經傳聲韻

農圃醫卜星相樂府諸家稍有得處輒著數言古有本草一書自炎皇及漢梁唐宋下迨國朝註解羣氏舊矣第其中舛繆差謫遺漏不可枚數廼敢奮編摩之志僭纂述之權歲厯三十稔書攷八百餘家稿凡三易複者芟之闕者緝之譌者繩之舊本一千五百一十八種今增藥三百七十四種分為一十六部著成五十二卷雖非集成亦龐大備僭名曰本草綱目願乞一言以託不朽予開卷細玩每藥標正名為綱附釋名為目正始也

次以集解辯疑正誤詳其土產形狀也次以氣味主治
附方著其體用也上自墳典下及傳奇凡有相關靡不
備采如入金谷之園種色奪目如登龍君之宮寶藏悉
陳如對冰壺玉鑑毛髮可指數也博而不繁詳而有要
綜核究竟直窺淵海茲豈僅以醫書觀哉實性理之精
微格物之通典帝王之秘籙臣民之重寶也李君用心
加惠何勤哉噫砥玉莫剖朱紫相傾弊也久矣故辯專
車之骨必埃魯儒博支機之石必訪賣卜予方著弇州

卮言恚博古如丹鉛卮言後乏人也何幸覩茲集哉茲
集也藏之深山石室無當盍鐫之以共天下後世味太
元如子雲者皆萬歷歲庚寅春上元日弇州山人鳳洲
王世貞拜撰

重訂本草綱目原序

大凡書不足以集大成其編纂不足以備體用則綱目
勿稱焉載籍極博猶為考信是也曩東璧李先生荆楚
博雅君子也成本草綱目一書人第知先生綜核羣籍

文成億萬分十六部五十二卷不知以彼其才歲歷三十霜書采八百餘家稿三易然後告成事焉其間圖象繪形芟複補闕繩譌解惑仍其舊而新是圖如舊本千五百一十有八種而外所增三百七十有四蓋李氏之新書也亦既勤且詳進乎大道矣然未敢自信請王弼州先生為玄晏往余寓目而游心焉先生之書觀止於發凡與遺表中獨是輯成治法見其炮製一準乎雷公且有用苗用根用子與葉之別申言寒熱溫涼之性升

降浮沉之理味有五曰甘曰鹽曰酸曰苦曰辛治有三
曰汗曰吐曰下以越宣通瀉補輕重滑澀燥濕之十劑
復權衡大小緩急奇偶復之間明晰大毒小毒無毒畏
惡相反之忌至於分引經絡列諸驗方衷夫藥性易不
云乎本乎天者親上本乎地者親下亦各從其類也矧
清陽之氣出上竅濁陰之氣行下竅清陽發腠理濁陰
走五臟亦大彰明較著者也豈第物產從地名從主人
便參稽觀覽云爾哉斯又先生之精微焉者也於是孝

子之事親與國手之活人鏡觀此書許世子栽杏叟之
之事吾知免矣然本草非先生昉也始於炎黃既於岐
高盛於漢衍於梁浸淫於唐宋曰綱曰目至先生而大
備比於史事紫陽溫公分路揚鑣何多讓焉先生是書
自昔仁廟間一刻再刻其圖似是而非者有焉其文烏
焉魯魚者有焉余與友人黼明錢子恂圖刻之未工商
讐較之獨舂踵事增華為重訂梓宇內久推第一善本
今年春黼明子倦於事且謂余歸里以來無所事事盡

授余行世余惟宇內同人咸知余與黼明子於先生之
書相與以有成也今復研訂一過不惜洛陽紙貴夫庸
知作者之與行世者不功相半乎順治乙未澹寧子玉
函吳毓昌謹序

進本草綱目疏

湖廣黃州府儒學增廣生員李建元謹奏為遵奉明例
訪書進獻本草以備采擇事臣伏讀禮部儀制司勘合
一欵恭請聖明勅儒臣開書局纂修正史移文中外凡
名家著述有關國家典章及紀君臣事跡他如天文樂律
醫術方技諸書但成一家名言可以垂於方來者即訪
求解送以備采入藝文志如已刻行者即刷印一部送
部或其家自欲進獻者聽奉此臣故父李時珍原任楚

府奉祠奉勅進封文林郎四川蓬溪知縣生平篤學刻
意纂修曾著本草一部甫及刻成忽值數盡撰有遺表
令臣代獻臣切思之父有遺命而子不遵何以承先志
父有遺書而子不獻何以應朝命矧今修史之時又值
取書之會臣不揣謏陋不避斧鉞謹述故父遺表臣父
時珍幼多羸疾長成鈍拙嗜典籍若啖蔗飴攷古證
今奮發編摩苦志辯疑訂誤留心纂述諸書伏念本草
一書關係頗重註解羣氏謬誤亦多行年三十力肆校

讐歷歲七旬功始成就野人炙背食芹尚欲獻之天子
微臣採珠聚玉敢不上之明君昔炎皇辨百穀嘗百草
而分別氣味之良毒軒轅師岐伯遵伯高而剖析經絡
之本標遂有神農本草三卷藝文錄為醫家一經及漢
末而李當之始加校修至梁末而陶弘景益以註釋古
藥三百六十五種以應重卦唐高宗命司空李勣重修
長史蘇恭表請伏定增藥一百一十四種宋太祖命醫
官劉翰詳校宋仁宗再詔補註增藥一百種召醫唐慎

微合為證類修補衆本草五百種自是人皆指為全書
醫則目為奧典夷考其間玼瑕不少有當析而混者如
葳蕤女萎二物而併入一條有當併而析者如南星虎
掌一物而分為二種生薑薯蕷菜也而列草品檳榔龍
眼菓也而列木部八穀生民之天也不能明辨其種類
三菰日用之蔬也罔克的別其名稱黑豆赤菽大小同
條硝石芒硝水火混注以蘭花為蘭草卷丹為百合此
寇氏衍義之舛謬謂黃精即鉤吻旋花即山薑乃陶氏

別錄之差譌歐漿若膽草菜重出掌氏之不審天花枯
樓兩處圖形蘇氏之欠明五倍子構蟲窠也而認為木
實大類草田字草也而指為浮萍似茲之類不可枚陳
畧摘一二以見錯誤若不類分品列何以印定羣疑臣
不揣猥愚僭肆刪述重伏者芟之遺缺者補之如磨刀
水潦水桑柴火艾火鎖陽山奈土茯苓番木鱉金枯樟
腦蝎虎狗蠅白蠟水蛇狗寶秋蟲之類並今方所用而
古本則無三七地羅九仙子蜘蛛香猪腰子勾金皮之

類皆方物土宜而裨官不載今增新藥凡三百七十四
種類析舊本分為一十六部雖非集成實亦粗備有數
名或散見各部總標正名為綱餘各附釋為目正始也
次以集解辨疑正誤詳其出產形狀也次以氣味主治
附方著其體用也上自墳典下至傳奇凡有相關靡不
收采雖命醫書實該物理我太祖高皇帝首設醫院重
設醫學沛仁心仁術於九有之中世宗肅皇帝既刻醫
方選要又刻衛生易簡藹仁政仁聲於率土之遠伏願

皇帝陛下體道守成遵祖繼志當離明之正位司考文之大權留情民瘼再修司命之書特詔良臣著成昭代之典治身以治天下書當與日月爭光壽國以壽萬民臣不與草木同朽臣不勝冀望屏營之至臣建元為此一得之愚上千九重之覽或准行禮部轉發史館采擇或行醫院重修父子銜恩存歿均戴臣無任瞻天仰聖之至